



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



TAPAK 7

AC Milan striker Zlatan Ibrahimovic asaya nungi anener

US-i nuclear noknu azuoktsu ayongzükba



VOL. XX NO. 234 (ADOK 234) DIMAPUR SANGTENNÜ (TUESDAY) AAMI (JUNE) 06 2023 ₹ 5.00

Manipur nung yimtsung 15, tenla ki 15 aser school 11 rongdoktsüogo: ITLF

Imphal, June 5, 2023

(Agencies): June 4, 2023 nü Manipur kübok Sugnu tesem nung yimtsung 15, tenla ki 15 aser school 11 nung mi senoktsü ta Indigenous Tribal Leaders' Forum (ITLF)-i metetdaksü.

Union Home Minister Amit Shah-i tawa Manipur semdangba sülen ozüing alema inyaksangshi kanga bulua kümogo aser nisung 10 taküm sama, ta ITLF-i tanü sangdong ka nung metetdaksü.

May 30 Chandel kübok yimtsung 8 aser Kangpokpi kübok yimtsung 7 rongdoktsüogo ta parnoki ashi.

Meitei telungpurtemi state force dang nungi prangpong rakzüka bener aoba aser lisopur yimtsungtem rongdoktsüba atema tebilemstü abener. Meitei nunger ya Arambai Tenggol aser Meitei Leepun züngsemtem lir aser parnok ya Meitei-centric state forces-i yarir, ta ITLF-isa metetdaksü.

Amit Shah-i Manipur semdangdang pai anogo 15 yimjung nung alitsü sangoktsüba anema Meitei telungpur teloki Kuki-Zo nunger amak, ta ITLF-isa ashi.

Arambai Tenggol-i Kuki Zo nunger amakdang bangdak district Superintendent of Police office tem nung agütsüba licensed guns amshiba kulitem lir. Hengsi nunger Holjakai-i "Arambai Tenggol Set 2" ta ziluba prangpong ka ngutetogo, ta ITLF-i metetdaksü.

Ozüing alema inyaksangshiaka aser nisung takütem samaka Manipur Chief Minister aser Inner Manipur nungi MP nati ola madoker. Amit Shah-i anogo 15 nü yimjung alitsü sangoktsüba ya Meitei nungeri lisopurtem amaksü aser tepsettsü mapang ka ama benshir, ta parnokisa ashi.

"Meitei nunger yimjung raksaba aitsür aser Centre sorkari dang mapa inyaksü ayongzük. Centre-i Manipur nung lisopurtem anema inyakba mapa anendaktsü atema security

maparen akangshitsü ayongzük" ta ITLF-isa ashi.

Kuki kaketshirtemi NH2 lapokba magizük

Committee on Tribals Unity (COTU)-i National Highway-2 mokdangba agienba atema Hombarnü Kuki Students' Organisation-city branches-i aitsüogo.

Union Home Minister Amit Shah-i mepishiba sülen COTU-i mapang tatsüka atema NH-2 mokdangba agientsü lemtet. Iba National Highway ajanga Manipur kübok Imphal aser Nagaland kübok Dimapur sendakteper.

COTU-i June 5 nungi 11 tashi lenmang mokdangba agientsü ta osang metetdaksü.

Ajisüaka, Kuki kaketshir teloktemibo COTU lemtet aitsür. India sorkari indang "Peace Mission" pusema iba lemtet ya agiaka COTU-i sangdong agütsüba anogo nung Sugnu nung mi senoktsüba aser injang khaloktsüba den meputep ta parnoki sangdong ka nung ashi. Iba sangdong nung KSO Pune, KSO Chandigarh, KSO Silchar, KSO Kerala, KSO Mumbai, KSO Coimbatore, KSO Guwahati, KSO Bangalore, KSO Kolkata, KSO Shillong, KSO Imphal, KSO Hrypyderabad, KSO Chennai aser KSO Delhi tirtemi sign süa lir.

"Iba lemtet ya public aser CSOs tsüingda shisalemsatepa sülen agiba lir ta COTU-ia shir saka nübertembo jashir. Anungji onoki parnok dang shir den shisalemsatepba ta asüingdang. Nenoki nübertem den asüingdangtepa lemtet agiba süra kechiba iba lemtet ajanga public jashidaktsür" ta Kuki nunger kaketshir teloktemisa asüingdang.

Kuki Students' Organisation indang City Branches-i ozü nübertem den külemi noktaka lir aser Committee on Tribals Unity (COTU) dang tekaratiba nung parnoki sangdongba jangjatsü ayongzük, ta parnokisa metetdaksü.

Governor La Ganesan-i plastic pollution azuoktsu ayongzük



June 5, 2023 nü Raj Bhavan, Kohima kima nung Governor La Ganesan-isa Ginkgo Bilabo süngdong ka atemba angur.

Dimapur, June 5, 2023

(Agencies): Nagaland Governor La Ganesan-i anir Raj Bhavan, Kohima nung ketdangsürtem aser staff den Kohima Forest Division-i World Environment Day mongogo.

June 5, 2023 nü Dr Imkongliba Ao Hall, Raj Bhavan, Kohima nung iba sentong agi.

"World Environment Day ya küm shia June 5 nung amonger aser iba anogo nung lipoküm wazüka ayutsü indang osang prokshir. Tsüingsang-mopung melenshiba, süngdong atsüingba aser mopung menenba ajanga meimchir taküm nung kongshir anungji nisung ajaki lipoküm wazüka ayutsüba aser asen alima kümzüka ayutsü asoshi tongti süa bilemstü" ta Nagaland

Governor La Ganesan-i ashi.

"Tanü asenoki plastic pollution atema inyaksüla. Alima ya plastic agi süngogo aser recycle mesümar. Iba jagi plastic ajanga asen lipoküm menentsür aser meimchir, shiruru aser alima asoshi timtem agütsür" ta Governor-i World Environment Day onük nung ajemdaker olen ka ashi.

"Asenoki plastic amshiba ajema akümtsüla aser akokba tashi plastic reuse asütsüla aser plastic jana recycle asütsüla. Asenoki plastic ajanga teraksa bentsür aruba meteta alitsüla aser külemi yaritepa plastic pollution samatsütsü merangtsüla" ta La Ganesan-isa ashi.

DFO, Kohima aser par teloki "Clicktoplant.com" tenzükba

atema tenüingsang agütsür ta paisa shisem.

Iba green initiative ajanga asen linük nung süngdonglidong teimba akümba dang masü saka lokti balala aayangdak angutsü. Anungji nisung ajaki green initiatives nung shilem agitsü ayongzük, ta Nagaland Governor-isa ashi.

Tanü La Ganesan-isa Raj Bhavan nung Ginkgo Bilabo süngdong ka atem.

Paisa "Clicktoplant" website lapoktsü aser 'Nino' Mascot sayatsü.

Governor Ganesan-i kaketshirtem asoshi oratorical contest nung takok angur nem sempe lema agütsü.

Iba tetoktepa nung Corragio School Kohima nungi Class 3 kaketshir Vimeyono-i mezüingbuba jenjang, Living tree School, Tsiepugei nungi class 10 kaketshir Kelhouvinuo Caroline Rutsa-i tanabuba aser Rev. Dr Neilliezhu Usou Memorial School nungi class 5 kaketshir Duve Khamo-i tasembuba jenjang sempettem angu.

Sentong nung Kohima Divisional Forest Officer (DFO) Rajkumar M, IFS-ia o tatsüka jemi aser Ecotourism Management Committee (EMC) Toupheema Chairman den Government High School Forest colony, Kohima nungi kaketshir aser tesayurtem aden,

Dimapur nung Reduce, Reuse, Recycle (RRR) campaign tembangogo



Dimapur, June 5, 2023 (TYO):

Ministry of Housing and Urban Affairs kübok Dimapur Municipal Council (DMC)-i Reduce, Reuse, Recycle (RRR) campaign tembangba sentong tanü agiogo.

Iba sentong ya "Meri Life Mera Swach Shehar" omen nung ajemdaker agia aru aser Hombarnü DDSC stadium nung tembang.

Iba campaign ajanga nübertem dang süoshi, kaket, plastic osettem aser tanaben amshitetsüba osettem angati tenlatsü ayongzük.

Dimapur Municipal Council-i hopta asem tashi campaign agia arudang kaket tejen 986, plastic seret 310 aser süoshi o tsüingsem

seret 3686 bendenteta liasü. Iba campaign nung colony 11, telok balala aser kijatemi shilem agia liasü aser tenla arubatem nungdabapur nem lema agütsüogo.

"Waste management indang osang ya kilen shia dang sangoktsütsüla aser iba ajanga nisung shiai iba nung yariteptsü. Sorkar mesüra Municipal body ka dang metalokba ajanga alizüing matongtsü, asenoki iba tebilemstü atema jungjunga shisadangtsüla aser loktii shilem agitsüla" ta Dimapur Deputy Commissioner Sachin Jaiswal-i ashi.

DMC-i Dimapur nung teti atema RRR Centre ka lapoktsü maparen inyakdar. Iba ya city

aser ward level nung asütsü aser osettsüsettem bendenttsü. Centre sorkari tenzükba maparen ya local jenjang nung maneni inyaka aotsüla kechiyong iba ajanga nungdabapurtem yarir" ta Dimapur Municipal Council Administrator, W Manpai Phomia ashi.

Paisa colony tem dang yariteptsü aser Dimapur tajungba kümdaktsütsü atema tebilembatem meshi.

Dimapur nung Reduce, Reuse, Recycle (RRR) campaign nung Sematilla colony-i mezüingbuba jenjang, East Police colony-i tanabuba aser Lengrijan colony-i tasembuba jenjang takoktem angu. Takoker nem senpet aser kulikakettem agütsü.

S&WSSO, PHED-i "World Environment Day 2023" among

Dimapur, June 5, 2023 (TYO): June 5, 2023 nü Sanitation & WSSO, PHED ajanga "World Environment Day 2023" sentong ayonga agi.

"Beat Plastic Pollution" omen nung ajemdaker Ara Mile, Dimapur nung sentong ka agia liasü. Iba sentong nung District Coordinator & WASH Consultant, Dimapur Imojungla menden liasü.

Sentong nung Executive Engineer, Sanitation & WSSO, PHED Er. Ichirang Zeliang-i sentong indang osang tatsüka lemsatep aser Darogapathar Village Council chairman Ado Bizo-i o tatsüka jemi.

Dimapur Deputy Commissioner Sachin Jaiswal (IAS)-i World Environment Day 2023 indang okila jemi aser

Executive Engineer, PHED Urban Division Dimapur-i Er. Bendangtola Walling anküp tepela o jemi.

Iba sentong nung Caps, Reusable Tote bags, dustbins aser brooms lema agütsü aser Highway nung lokti nübodoka merükmeju mapa inyak.

Dimapur District Administration, Airport Authority Dimapur, Darogapathar & Aoyimi Village Councils, Youth members, Business Community, St. Joseph University kaketshirtem, Love Care Home, Child Care institution, Implementing Support Agency (ISA) Act of Kindness Society, Team Better Dimapur, 43 Assam Rifles, PHED, Purana Bazar Officers & Staffs-i Highway den Dimapur Airport merükmeju liasü.



Alima Lipuküm Anogo, June 05 nü Dimapur Ao Lanur Telongjemi Dimapur nung City Clock Tower nungi DC court lenjem tashi Tajen Ao Road nung nübodoka merüktetsüba sülen Mangmetong Senso Telongjem Dimapur ketdangpurtem den Tongti Zülur ASTD, DALT Ketdangpurtem aser DALT advisor külemi agiba noksa ka yangi angur. Iba nübodok mapang parnoki süngdonglidongtema tema yutsüogo. DAYO-isa iba kasa lenmang nung mejungi aliba tesemtem yanglushitsüogo aser street lights a enoktsüogo. (TYO)

Raj Bhavan Kohima nung World Environment Day amung

Dimapur, Aami/June 05 (TYO): Alima ajunga den külemi Nagaland Governor La Ganesan aser Raj Bhavan, Kohima nung staff tem aser Kohima Forest Division külemi 'Solution to Plastic pollution' omen nung ajemdaker June 5, 2023 nü Dr. Imkongliba Ao Hall, Raj Bhavan, Kohima nung World Environment Day munga liasü. Iba sentong nung jembidang Governor-i ashiba agi, lipajen aser lipajen wazüka ayutsü indang nüburtem nem tali tejangjaba nung angatetdaksütsü mechi küm shia June 5 nü World Environment Day ya amunger. Alima nung lipajen tebilemtsü, talisa tzi-mopung melenba, arem samaba aser lipajen menenba ajanga anogoshi nisung ajak dak kongshir, ta pai ashi. Anungji nüburtem lipajen wazüka ayutsüla aser asenok aliba alima kumzuka ayutsü asoshi tongtipangtiba ama amshitsüla, ta ashi. World Environment Day indang omen nung kongshia jembidang pai nübur ajunga dang alima nung plastic agi menentsüba atema tangsa mera agitsü nüngdaker, ta ashi. Plastic oset agi alima

süngogo aser recycle sütettsüba dak alia amshir. Plastic timba asen lipajen nung tembanger aser meimchir, shiruru aser lipajen dangi timtem bener arutsü, ta pai ashi. Nüburtemi anogoshi takum yimya nung plastic amshiba ajemtsüla ta pai ashi aser akok tashi tanaben amshitsü aser plastic jana tem tanaben yanglushia amshitsü ayongzuka liasü. Ajak dang tongtipangtiba pei angatetsüla aser asen müketa aliba nisungtem nem plastic ajanga timtem agütsüba angatetdaksütsüla aser plastic agi alima menentsüba samatsütsüla, ta ashi. DFO Kohima aser par team ajanga "Clicktoplant.com" sentong tenzükba atema Governor-i tenüngsang agüja liasü. Iba sentong ajanga asen linük nung süngdong-lidong awajemba tali kumdaksüba kisüng masü saka nüburtem nem takum alitsü maongka agütsür, ta pai ashi. Pai sentong nung adener ajak dang alima plastic agi menentsüba nungi salatsü asoshi iba sentong nung shilem agitsü ajungshia liasü. Iba sentong nung Governor-i "Clicktoplant" semzüktsü aser

'Nino' mascot sayaja liasü. Iba sentong nung Governor ajanga mezüngbuba online ajanga süngdong tema liasü. School azünger asoshi oratorical contest nung takok angur nem pai senpet agüja liasü. Iba tetoktepba nung mezüng jenjang ya Corragio School Kohima nung Class 3 nung azünger Vimeyono-i angu, tanabuba jenjang Living tree School, Tseiepugei nungi Class 10 nung azünger Kelhouvino Caroline Rutsa-i angu aser tasembuba jenjang Rev. Dr Neiliezhü Uso Memorial School nung Class 5 nung azünger Duve Khamo-i nguteta liasü. Iba sentong nung DFO Kohima, Raj Kumar M, IFS-ia o tatsüka jembi, kong Chairman, EMC Touphema aser GHS Forest colony, Kohima nungi kaketshir aser tesayurtem dena liasü. Iba sentong JSO Banua Koza-i anir agi, kong ACF Kohima Dr. Sevono Seletsu ajanga tarur pela agizükba o jembi aser RFO V Mato Koso-i melepzüng o jembia liasü. Iba sentong tembangba sülen Governor-i Raj Bhavan nung Ginkgo Bilabo süngdong ka tema liasü.

Dimapur nung mejangjaba nisung tasü mang ka ngutet

Dimapur, Aami/June 05 (TYO): Dimapur Police sangdong ka ajanga ashiba agi, June 4, 2023 nikongdang 5:30 ako meta old NST Bus Station, Dimapur anasa arishi küm 35 nungi 40 tsüngta mejangjaba nisung (non-local tebur) tasü mang ka nguteta liasü. Iba nisungba ya meshimetsür ka asütsü aser shiranga asüba alitsü südi, ta temolung melemi lir. Tim masüba mapa inyakba kecha meputet. Ozüng agi melaba maparen ajak tembangba sülen

tasü mang ya PM examination/ jangjatsü atema Dimapur District Hospital Morgue nung yua lir. Iba nisungba ya T-shirt sentüsü temesüng ka, sentüsü tanak aser temeren temdangpusa tula ka aser aut sentüsü long pant ka semer liasü. Kibur/kinunger/tembar temi Officer-in-Charge, GRPS, Dimapur den Mobile No. 7085055021 ajanga tongteprateptsü akok, ta sangdong ajanga ashi.

NSCN/GPRN ajanga Zheshito Swu asükhu lemsatep


Dimapur, Aami/June 05 (TYO): NSCN/GPRN indang Kilo Kilonser Zheshito Swu anungji June 3, 2023 nü asüba atema NSCN/GPRN indang Tir aser Ato Kilonser-i anir civil aser military züngsem ajungai mang ayimer, ta NSCN/GPRN sangdong ka ajanga ashi. Asür Zheshito-i temolungjang ajak agi bendanga agütsür Naga linük tenzük, koba Naga linük puti otsü nung teti alitsü. Naga nung asoshi pai bendanga agütsüba aser anibelem mesasai tenzükba teti bilemtetsü, ta sangdong ajanga ashi. Pai par yimtsüng nung GB

inyakba aser ano civil society organisation nung lenir ama inyaka Naga nung tenzükba ya asadangtsü makok. Naga nung asoshi tejangja nübu ka samaogo aser pa asüba ajanga tawa adokba ya onsara tulu lir. NSCN/GPRN ajanga mangyimer kibong den asükhu lemsateper aser Tulusang Tsüngremi parnok molung anisüngzüktsütsü aser tashi agütsütsü asoshi onoki sarasademer. Asür tanüla teti tatem makaba tepela aser tesunep nung anisüngzükjang ta NSCN/GPRN ajanga sarasademtsür, ta sangdong ajangasa ashi.



Alima ajunga den külemi Dr. Imkongliba Memorial District Hospital (IMDH), Mokokchung nung Eco Friendly Club teloki ayongzuka Dr. Imkongliba Ao Monument Garden, IMDH nung 'World Environment Day' sentong ayongzuka amungba mapang tangokba noksa nung angur. Iba sentong nung Forest Div. Mokokchung, Asst. Conservator of Forest, Moamongba-i 'WED' amungba nükjidong lemsatep aser sentong nung adener temi IMDH kilem nung süngdong balala tema liasü. Mokokchung, 5th June, 2023

LFI nung World Environment Day 2023 amung



Dimapur, Aami/June 05 (TYO): Lipajen samaa aoba aser tzi-mopung menenba tsükdak-rongdak tebilemtsü atema nübur nem awareness agütsüba yimya maneni amshia taküm Livingstone Foundation International indang Eco Club aser Yuva Tourism Club ajanga World Environment Day 2023 ayongzuka liasü. Iba anogomung nüngtem nung 'Beat Plastic Pollution'

omen kübok Bicycle Awareness Rally ka aser süngdong-lidong atemba sentong ka ayongzuka liasü. School Morning Assembly mapang sentong tatsüka agia Bicycle Rally ya Director LFI, Ani Yephthomi-i flagged off sütsü. Iba sentong nung School Chaplain, Zhimoholi S. Zhimo ajanga sarasadem aser Grade-XII nungi Anna Zhimomi ajanga

iba anogomung ratet indang shia liasü. Bicycle rally nung Grade VI nungi XII tashinung azüngba kaketshir temi shilem agia liasü, koba School Campus nung tenzük aser Nagaland Zoological Park nung tembang. Iba sülen Grade-I nungi Grade XII tashi kaketshir den tesayur temi school campus LFI Green Lawn area nung Asoka Tree tema liasü.

Dimapur DPDB züngsem temi süngdong atem

Dimapur, Aami/June 05 (TYO): World Environment Day nüngtem nung Dimapur District Planning and Development Board (DPDB) züngsem temi Dimapur district kübok tesem balala nung süngdong-lidong atemba den Dimapur yimti tebour jungdaksütsü mapa inyaka liasü. Advisor, Labour & Employment and Skill Development and Excise aser Chairman, Dimapur DPDB, Moatoshi Longkumer lenisüba kübok May 5, 2023 nü DPDB Dimapur senden nung lemtetba ama iba maparen ya inyaka liasü. ADC Dimapur, Mhalo Humtsoe tekolakba sür committee ka nung züngsem DFO aser DHO nung temi Dimapur yimti nung DPDB Dimapur ajanga süngdong

atemtsü aser Dimapur yimti tebour junga yanglutsü atema DC Court junction nungi Duncan tashi, Dimapur Ao Baptist Arogo junction nungi Khermahal tashi, Essar Pump nungi Old Dhansiri bridge (lenmang anatsüle) aser Supermarket junction nungi Circuit House telungi aiba tesemtem jangiateta/shimteta liasü. Yamaji DFO office ajanga Bakul- Spanish Cherry aser Ajar tree-Lagerstroemia saplings agütsü, aser DHO office Dimapur ajanga ali temu (manure) agüja liasü. DPDB züngsemtem aser parnok indang staff temi yin agi yangluba 'tree guard' tem bener adenshia parnok nem lezmüktsüba tesem nung süngdong atem aser jana-reja müreka liasü.

Rajnath Singh-i US defence secretary Lloyd Austin den senden amen



June 05, 2023 nü New Delhi nung Indian Defense Minister Rajnath Singh-i U.S. Secretary of Defense, Lloyd Austin agizükdang tangokba noksa nung angur.

New Delhi, June 05 (Agencies): Hombarnü New Delhi nung Defence minister, Rajnath Singh-i US Defence secretary, Lloyd Austin den senden amendang Indo-Pacific densema region nung security tensa aser India-US tsüingda defence tesendaktep atema jembio.

Kobi melii Ato kilonser, Narendra Modi-i US semdangtsü lia US Defence Secretary-i Amongnü nungi tenzüka anogo ananü India semdang.

Osang angazükba agi, Singh aser Austin nati fighter jet engines atema India den technology lemsatepsü asoshi 'General Electric' onük nung o lemtepogo aser India-i US

defence major General Atomic Aeronautical Systems Inc dang nungi MQ-9B armed drone 30 dollar sen billion 3 agi alizüksü aliba atema-a jembio.

Hombarnep New Delhi nung linük nung armed service asem nungi sepaitemi United States Secretary of Defence Lloyd Austin nem akhüm agütsü, aser iba sentong nungji Rajnath Singh-a liasü.

Hokolbarnü Singapore nung aliba Shangri-La Dialogue nung jembidang US Defence secretary-i, "India den Critical & Emerging Technology atema inyaker, tongtibang defence sabang atema asenoki lenmang tasen bushidi," ta jembia liasü.

Yaküm May ita nung US Tir Joe Biden aser Ato kilonser

Modi nati US-India initiative on Critical & Emerging Technology (iCET) sangdonga liasü; iba tezüngzüktep kübok linük anati technology partnership tajungba akümtsü atema inyaksü aser defence industrial atema amalitepa inyaksü.

iCET tezüngzüktep ajangsa linük ana tsüingda shisaliok aser industry tsütsü tesendaktep tajungba akümba den külemi artificial intelligence, quantum computing, 5G & 6G aser biotech tsütsü amalitepa inyaksü.

Election Commission ketdangsertemi June 15 nü Rajasthan semdangtsü

New Delhi, June 05 (Agencies): Taküm küm tatembanglen state ishika nung assembly election agitsü lia Election Commission nungi ketdangsertemi election agitsü aliba state tem semdang tenzüko.



Deputy election commissioners-i June 15 aser June 16 anogotem nung Rajasthan semdanga election atema terenemshiba asadangtsü.

Election Commission ketdangsertemi Mizoram bo semdangogo.

Mizoram legislative assembly kümsük taküm December ita nung tembangtsü aser Rajasthan, Chhattisgarh, Telangana aser Madhya Pradesh state legislative assemblies kümsük sangküm January ita nung anogo balala nung tembangtsü.

Anungji state pongu nung assembly elections ji taküm küm tatembanglen külemi dang agitsüa akok, kechiyong sangküm Lok Sabha election agitsü lir, ta osang angazüker.

Tang Deputy election commissioner temi election agitsü aliba state tem semdang, iba sülen tarutsü nung Full Commission- Chief Election Commissioner den Election Commissioners-ia item state semdanga yimtenren party balala nungi lenirtem aser stakeholders ajurua election atema terenemshiba jenjang asadangtsü.

Amit Shah-i Kerala nung Archbishop Andrews Thazhath ajuru

New Delhi, June 05 (Agencies): Hombarnü Union Home Minister, Amit Shah-i Kerala semdangba mapang nung Catholic Arogo nung tongti putir, Archbishop Andrews Thazhath ajuruogo, ajisüaka tena senden amendang kechisa jembiar mejangjar, ta osang ka ajanga metetdaksü.

Kerala kübok Kochi nung aliba Amrita Institute of Medical Sciences küm 25 ajungba Jubilee sentong nung adentsü atema Amit Shah-i Kerala semdanga liasü.

Iba mapang nungji International Airport anasa hotel ka nung Amit Shah-i tongti putir Andrews densema Khristan putirtem kar ajuru.

Tesülen Shah-i twitter ajanga putirtem den külemi tangokba noksa ka lemsatepa, "Ni Kochi semdangba mapang Archbishop of Thrissur Andrews Thazhath, putir Renny Mundenkurian aser putir Alex Maprani nunger ajuruogo," ta lemsatep.

Archbishop Andrews Thazhath ya Catholic Bishops' Conference of India nunga Tir lir.



June 05, 2023 nü Bangladesh yimtiba, Dhaka nung Indian Chief of Army Staff General Manoj Pande aser Bangladesh Chief of Army Staff General SM Shafiuddin Ahmed na senden amenba sülen tangokba noksa nung angur.

Bank of Baroda **CIRCULAR ROAD BRANCH**
Ground Floor, Faith Building, Near Khermahal Traffic Point, Dimapur, Nagaland- 797112
Email: vjdima@bankofbaroda.co.in

SECURITISATION AND RECONSTRUCTION OF FINANCIAL ASSETS AND ENFORCEMENT OF SECURITY INTEREST ACT 2002 NUNG CHAPTER III KÜBOK SECTION 13(2) NUNG AJEMDAKER NOTICE AGÜTSÜR

- To,
1. **M/S. BOTOHO SEMASTEEL FABRICATION (Borrower)**
Prop. Mr. Botoho Assumi, House No.9, Chekiye Village, 3rd Mile, NH-29, Dimapur- 797112, Nagaland.
2. **MR. BOTOHO ASSUMI (Mortgagor)**
S/o Kakiho Assumi, House No.9, Chekiye Village, 3rd Mile, NH-29, Dimapur- 797112, Nagaland
3. **MR. KASHETO JAKHALU (Guarantor)**
S/o Mr. Nihoi Jakhalu, H/No. 9/130, Hotel Swagat, City Tower, Dimapur, Nagaland- 797112.

Dear Sir/Madam,
Subject: **Bank of Baroda (taoba mapang Vijaya Bank), Circular Road, Dimapur Branch-i nenok nem senotsü teyari agütsüba- nenoki sendong aser sen tetemlok instalment nung agütsütsü aliba magütsütetba.**

Onok, Bank of Baroda (taoba mapang Vijaya Bank), Circular Road, Dimapur Branch-i 03.05.2023 anogo nung nenoki agütsüba addresses nung Demand Notice agütsü. Iba Notice ji nenok nem magütsütet. Notice nung shia alibatemji yangi tsüinglanglen lir.

Onok, Bank of Baroda (taoba mapang Vijaya Bank), Circular Road, Dimapur Branch-i nenoki mepishiba nung ajemdaker nenok rongnung No.1 nem agreement/s aser document/s telatetbatem nung ajemdaker senotsü teyari agütsü Credit facilities aika agütsü. Item credit facilities aser nai tagütsütsü aliba sen ajakji **Annexure-I** nung shia lir.

Senotsü teyari atema security asoshi nenok **No. 1, 2 & 3-i** Bank atema security interest renem, aser iba atemaji nungdakba security Documents/s / agreement/s ajanga belenshitetba osettsüset/ melebenshitetba kiojen Mortgage süogo. Item osettsüset aser kiojen indang osang tejangja **Annexure-II** nung shia lir.

Bank den nenok ajaki agreement/s aser document/s renemba nung ajemdaker nenoki agreement/s aser Document/s nung aliba ama senotsü teyari anguba atema sendong ajak meyipa agütsütsü nungdak, iba dak alia agreement/s aser Document/s nung shia aliba rates nung sen tetemlok ajak agütsütsüla.

Temalen shia aliba senotsü teyari/credit facilities indang sentsüh aoba inyakyim mejungi kümogo, anungji nenok **No.1-i** sendong aser sen tetemlok meyipa magütsütetba ajanga **24.04.2023** anogo nung Bank-i iba sentsühji **Non Performing Asset** ta sangdongogo.

Yamaji Securitization and Reconstruction of Financial Assets and Enforcement of Security Interest Act 2002 (tang nungibo 'iba Act' ta amshitsü) kübok Section 13(2) nung agütsü aliba tashi amshia Bank of Baroda-i **24.04.2023** anogo tashi nung sentsüh ajakji **Rs.16,73,696.00 (Rupees Sixteen Lakhs Seventy Three Thousand Six Hundred Ninety Six Only)** lir ta sangdonger aser iba denji maneni tarutsü sen tetemlok adentsü.

Anungji onok Bank of Baroda-i iba notice anguba anogo nungi tenzüka anogo 60 tsüingda nenok ajak senteper Bank nem **Rs.16,73,696.00 (Rupees Sixteen Lakhs Seventy Three Thousand Six Hundred Ninety Six Only)** den külemi **25.04.2023** nungi tenzüka contractual rates nung sen tetemlok den costs, charges aser tanga sen agüjang ta tuyur.

SARFAESI Act kübok Section 13(13) nung ajemdaker nenok dang, Bank of Baroda, Circular Road Branch, Dimapur dang nungi tezüluba nung temelaba magibo secured assets kecha mayoktsü, lease masütsü mesüra iba dak sendakba inyaksangshi masütsü tuyur (ordinary course of business dak alaka). SARFAESI Act kübok Section 13(13) nung aliba alema inyakbaji ozüng alema lir aser SARFAESI Act kübok Section 29 nung ajemdaker temerenshi agütsütsü. Iba notice ya iba Act kübok Section 13(2) nung ajemdaker agütsür.

ANNEXURE-I

| Sl. No. | Nature of facility | Amount Sanctioned (Rs.) | Amount outstanding (Rs.) repayable by you |
|---------|-----------------------|-------------------------|---|
| 1 | OD 78730400000061 | 15,00,000/- | Rs.15,34,762.18 |
| 2 | BGECLS 78730100000147 | 2,90,000/- | Rs.1,38,933.82 |

24.04.2023 anogo tashi nung **Rs.16,73,696.00 (Rupees Sixteen Lakhs Seventy Three Thousand Six Hundred Ninety Six Only)** den **25.04.2023** anogo nungi sentsüh magütsü tashi contractual rates nung sen tetemlok aser costs, charges aser tanga sen densema lir.

ANNEXURE-II

(Sen apur indang Mortgage asüba osettsüset/Kiojen)
H/No.258, Block-3, Chekiye Village, Dimapur, Nagaland nung Mr. Botoho Assumi tenüing nung aliba Patta No. 72, Dag No.2/76, Mouza No.3 nung kimong 0B-1K-4 ½ L nung aliba ajak aser building.

Bounded By:
North tsütsülen: Sri Hokishe Assumi'er kimong, **South tsütsülen:** Approach Road, **East tsütsülen:** N.H. 29, **West tsütsülen:** Sri Khekiho Zhimomi'er kimong.

Date: 05-06-2023
Place: Dimapur
(Authorised Officer)
Bank of Baroda, Circular Road Branch



TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 06, 2023

Naga Club ki

Kohima nung public ground anasa Naga Students' Federation (NSF) purtem office lir aser iba ki tejak nung Naga Students' Federation, Naga Club Building, Kohima ta zülua lir. Tetezü, NSF office amenoka aliba kiji Naga Club ki lir. Ajisüaka, tang Naga Club purtemi NSF purtem dang parnok kiji azüngtetjang ta yimjak nung dena shijen shiaka mazüngtettsüi alidang, Naga Club purtem jagi May 27 anepdang züngia lia iba ki raksatsüba mapa jagi Naga Club ki dang nungibo Naga Club purtem indang otsü metettsüang tongtibangba kümogo. Naga nunger tia junga alima aso 19 buba nung Khristan yimsü aruba den külemi kakteshisatsüsa angazüksüsa mapang tajung ka aru. Anungji, alima aso 20 buba tenzükdangbo, tangar menepa mesüaka, Naga nungertem rongnung azüng zülü ashir ishikabo liasü. Iba kasa mapang India lima ajunga British yimli kübok ayu, anungji Naga lima yaa tesadang kabo British yimten yimli kübok liasü. Iba ama mapang ka nung alima kintem agi telok ana kümer tongpang raratsü tenzük. Ibaji mezüngbuba alima rara liasü. Iba tongpang nung Naga nungertema British nunger sepaitem khu bentsür bendang lima tesem balala sema jajadang, tangar tashitemetet aser alima renlokba ngua tokolok shisatsü aien aser tongpang nungi pei limai meyipa arur külen Naga nunger tangar libaliru angur aser meteterem kar adenshia 1918 küm Naga Club tenzük. Ibai telok tenüng ya British nunger parnok alidak officers' club tenteta aliba jilu ajizüka Naga Club ta jatet südi ta bilemer. Atangji, tenüngbo Club saka parnoki inyakba mapabo 'political party' kati inyak ama Naga yimten mapa liasü, anungji parnoki club ka mapa dang nungibo tuluba kuma 'Naga Political Movement' tenzük. Aji oda, Naga Club tenzüker küm ter sülen 1929 küm British India yimten yimli yimsüsübaren reprangshia yanglushitsü atema British tatar hoho nungi Sir John Simon-i anir tatar yimsüsür par tenet Naga limai aruba mapang, Naga nunger tenüng nung Naga Club-i Sir John Simon-i aniba Commission nem tezüluba ka nung, Naga nungerbo India nunger masü, anungji British nungertemi India toktsür oaka Naga nungertembo British nunger densa lidakjang mesüra India kübok masü Naga nungertem ya balaka südakjang ta ashiba angur. Ibai Naga nunger asoshi mezüng yimten nüchiso asoshi ola adokba liasü. Iba anogo nung jagi Naga Club lenirtemi anir Naga nunger ta asüba kin ajak ka kuma longjema alitsü tangatetba agüja jemb meso. Iba ola aser mapa jagi Naga nungertem longjemdaksü. Atangji, 1929 küm Naga Club-i Simon Commission nem Naga nunger yimten temeten shia züluba shiti nung meyongnemer rongnung Ao kin nungibo shinga mangur. Ashiko, ibaji Ao kin tenüng nung nisung ka anati meyong anemtsüsa Aor longjema maliba agi tashi mamshitet asütsüa akok. Ajisüaka, iba jagi Naga nunger yimten temeten jembidak aser yimten nüchiso asoshi tongpang nokdaktak Ao kini shilem magi aser maden ta masü. Kechikomaka ser, Simon Commission nem tarutsü Naga yimten atema temeten aser taginüba zülur agütsüba sülenbo Naga Club tenüngtetshia Naga yimten asoshi inyakba mangashir. Ajisüaka, ano alima rara tanabuba anenli British nunger yimten lenirtemi yaria Naga Club nung adener rogotem dena Naga Hills District Tribal Council kümdaksü aser iba council yagi 1946 küm Naga National Council aküm aser NNC nung mezüngbuba tirjibo Ao kin nungi Wb. Aliba T Imti liasü. Iba ama mapang ka nung, British yimtenisa yaria Naga Club asoshi tang NSF purtemia amshia aliba ki ya yanglutsü. Ibayongji tanü tashi, Naga Club taküm liaka meliaka, par nungo aser nungshisa Naga Club building ta ajar. Aji oda, NNC tenzüka sülenbo, Naga Club-i 1929 küm Simon Commission nem agütsüba shiti nung shia aliba Naga yimten onüktem mapa akümtsübaji NNC telok mapa aküm. Iba nung jagi tenzüka tanü tashi Naga yimten nüchiso bushiba tongpang nung Naga nungertem koba jenjang nung nokdaka lir, aji asenoki metet. Atangji, 1984 küm Nagaland government teyari ajanga Naga Club khen tenzüksüba otsü ka lir. Ajisüaka, iba mapangbo Naga Club Building ya Nagaland government kübok Forest office amshia liasüba, government ket nungi NSF -i agiadoker liasü. Iba mapang nungi NSF teloki dang Naga Club kiojen ajak anepalua aru. Aji oda, Naga Club ali mali memetet kümsa küm aruba sülen, tang tejangrar kari Naga Club asentenshia tenzüker Naga Club ki kibur akümtsü merangba nungji tebilemdangtsü aika lir. Atangji, tanüa shitakba 1918 küm tentetba Naga Club-ji nungdakra Naga kintemi meteta aser Naga kin ajak dena kümshitsüla. Iba amaji ka masü ser Naga kintemi memetet nisung kari Naga Club tenüng amer Naga Club ki agitsü merangra, ibajibo shitakba 1918 küm tentetba Naga Club masü ta NSF teloki nokdaker. Iba tangatetba nungji Naga nunger ajak adentsüla. Tang ya Naga nunger atema shitakba nungdajibo, Naga Club ki masü Naga Club tenzüker dak aketba Naga yimten meimba shisatsü nung kümshitsü nungdaker.

OLEMSABANG

MOATSÜ ASER TSÜNGREM-MONG BENJONG YA WAZÜKA AYUTSÜLA

~ L.Kika Pongener

(Yashi adok nungi...)

Aji oda, asenoki kanga junga shisadanga, benjong amungba nungbo kecha aibelen mali ama angateter, aser yar-tsüngsangba ya-a asen sobaliba nung tongtipang ka ama angateter. Anungji moatsü aser tsüngrem-mung amungba aser yar-tsüngba ya mesamadaksüi wazüka ayutsüla-a ta bilemer. Ajisuaka, Moatsü aser Tsüngrem-mong among amungba nungji temelenshitsü kar lir, otsüla oboula nunger par libaliro yimya nung yi saa-yur jemtepba, yimya dak talila longsotepa pelatepba, moatsü aser tsüngrem-mong mapangbo pei apuani amaa-toker nuktapangda japojarria aser lidipodia litepba, item yimya tamajungtemjibo mebenshitsüla aser endoktsüla. Ano aji tang masü, otsüla-oboula nungeri par putu mapang mejema atenba ken-tem teimba ka tongerpur meimtepba/ menungratepba ken (Love song), aser nok ken, yim kati yim ka amakba/tekolak alepba ken, konang nungsang, ano ken karbo kati ka tenung sangtepba aser kati ka nemja-luja atenba ken teimba lir. Anungji tanü asenoki moatsü aser tsüngrem-mong mapang longsoteptsü apia yamala ken tentepa amungdang, meyiper akhi tejen mapang yim o yim na tsükchitepa aruba otsütem tanaben shilua bilemteta, tajung melena tamajung-ang ajangzüksüa ana nung lir. Anungji item ken melena yimli ken, akang-jongshitepba ken aser Tsüngrem külemba ken atentsüla. Kokrabang, otsüla oboula nunger nuknarar meimtepba ken, nokinketer mangko alepba, yim o yim na tsükchitepba ken melena, tanü putu den apet otsüla oboula nunger kensu nung ken tajung mejemer tentepa among nungang kanga agi tajungba asütsü.

Anungji tanü asenoki Moatsü aser Tsüngrem-mongji amungyonga, otsüla oboula nungeri amungba yimya nungji masü, saka Khristan tamangba yimya nung tembar-adianu jaoka, pei pei kibongi akokba lemsatepa, mesura lokti tentet balala-i pei pei tashi yari achi-ajemtsü tajungtiba renemer sentong tajung yanglur pelatepa amung nungbo kanga ajungtsü. Aser yimtsüng shiai pei pei tashi yari sentong tajung yanglur tsürabur mapang nungi akang-aksutepa, anja-jaoktepa lia aruba tembar yimtsüngtem jaoker, akhi limapur tsüngrem külemba melena tanü aseni amangba Tsüngrem dang temoatsü meshia aser tenungsang agüja, yar-tsüngsangtepa sobaliba asaya tapu balala asaya-a pelatepa amung nungbo temoatsü asütsü ta bilemer. Sobaliba ya akhidang koma liasü yamaji tang alitsüla, mesura akhidang koma benshia aru yamaji dang akang-akanga benshitsüla ta kecha talenba maka, putu tensa den apet tajungba tajungba asüngsashia melenshitsüla. Tanü asen putu ya sobaliba yimsoshiba mapang ka lir, aser iba yimsoshibaji kechi koma lia aru yamaji dang alitsü ta masü, saka sobaliba tamajungtem endoker putu tensa den medemdanga tajungba asüngteta melenshia yanglushir, sobaliba tajungtembo wazüka ayutsüla. Aser asenoki asen sobaliba ya tamang yimsu den meyoktepa mangatettsüla aser meyoktepa mebenshitsü kangasa tongtipang lir.

Aji oda, moatsü aser tsüngrem-mong amungbaji tai masü, saka iba benjong amungdang asenoki mebenshitsüyim yimya tamajungtem benshiba agi asen sobaliba benjong tajungji temenen benjong ama kümdaksür. Atangji, yi saa-yur jemtepba, lidipodia longsotepba, nuktapangdaa japojaritepba, item yimya tamajungtem jagi asen sobaliba benjong tajungji temenen yimsu-yimpong ama menena kümdaksür. Anungji asen sobaliba tajungtem, benjong-bentsü wazüka ayur ta asüdang, meyiper aseni amangba Tsüngrem jashitsüsa aser atakatem-ang angutsüsa yimya-tsüya tamajungtembo menenshitsüla. Aser asen sobaliba benjong-bentsü wazüka ayur ta asüdang, akhi tejen ken nok ken, mongko alepba ken, yim kati yim ka amakba ken tanaben shilua bener arua atenba agi, meyiper tsükchitep-ang tenzüksü. Ano moatsü aser tsüngrem-mong amungdang yi saa yur jemtepba melena sungo marok tajung, mayongtsü, amtsük-amsang tajung renema yur pelatepa longsotepa mungra aji asen sobaliba tajung wazüka ayur asütsü. Ano asenoki kanga junga angatettsüba kaji, otsüla oboula sobaliba benshir ta sur, parnok sung-long putu mapang manglong/mangsa aliba ama suoshi kecha magi sur sujak/langdem demer tsüngsangtepa ya-a mebenshitsüla, kechiyong iba ya-a tanü putu denbo mabet asütsü. Anungji moatsü aser tsüngrem-mong benjong ana ya mesamai wazüka ayutsüla ta tebilemba lemsateper. Aji oda, moatsü aser tsüngrem-mong munga aruba yimya nungji, Aor-sa asüyongjia among-sungküm balala asünungji, yimtsüng shia terara tepila alitsü akok, ajisuaka tongbenji-bo küsadang asünung, iba tangatetba nungji metongshia azüngtsü mepeshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ao Baptist Arogo Shillong-i 'World Environment Day' sentong agi



June 3-4, 2023 anogotem nung Ao Baptist Arogo Shillong-i ayongzükba 'World Environment Day' sentong nung State Investment Project Management and Implementation Unit (SIPMIU) nungi shisalen sayurtemi shilem agiba noksa nung angur. Telung noksa nung Dy. Director General of Forest (Central), Ministry of Environment, Forest & Climate Change, Shillong, Kr. Imtiena, IFS angur.

Shillong, June 05 (TYO): Ao Baptist Arogo Shillong-i (ABAS) 'World Environment Day' ayongzükba June 03-04, 2023 anogotem nung sentong tajung asameyanga agiogo; iba sentong ya 'Living in Harmony with Nature' omen nung ajemdaker agi.

June 03 anogo nung ABAS kübok tanurtem aser taintem lemdanger sentong temeja agi. Iba sentong nung shisalen sayur, Kr. Imtiena, IFS, Dy. Director General of Forest (Central), Ministry of Environment, Forest & Climate Change, Shillong aser State Investment Project Management and Implementation Unit (SIPMIU), Shillong nungi tesayurtem arua nüburttem nem tangazükba tajung agütsü.

Tanurtem asoshi, SIPMIU

ajanga 'Zero Littering' tesayuba agütsü, iba sülen, 'Living in Harmony with Nature' omen nung ajemdaker noksa yangluba tetoktepa agia liasü.

Kr. Imtiena Ao ajanga sentong lapoktsüba mapang lai, India sorkar ajanga tenzükba maparen 'Mission LiFE' metetdakja sentong nung adenertem ayongzük.

Climate Change sendakba oren nung Mission LiFE ajanga, Climate Change anema raratsü mapa ya linük nung lenirtem kija khuret masü saka nisung shia teinyaktsü khuret lir, ta tangatetba agütsü.

SIPMIU ajanga 'Solid Waste Management Rules 2016' aser 'Household level Composting - Garbage to Gold,' onük nung ajemdaker tesayuba tajung agütsü. Jana indokba

yimya ya joko India rangben, yimsüng aser jila ajak nung tzüzüng-ozüng telatet yur anepalutsü meranger, aser item tzüzüng-ozüng angatetta alitsü tim tesayuba agütsü.

Garbage to Gold (G2G) powder amshia, koda chiyongtsü aser jana agi tagitsü oset kümkdaktsütsü item tesayuba SIPMIU ajanga agütsü.

ABAS nung June 04 tekülem sentep kasa omen nung ajemdaker agi. Rev. Dr. Meyu Changkiri, ABAS Pastor ajanga iba ama sentong ya küm nung khen, 'World Environment Day' sentong tang masü, saka küm tepiyong Arogo teinyaktsü mapa ama angatetta inyaktsü, Arogo mapang aser rongsen indoktsü tangatetba agütsü.

Iba 'Eco-Sunday' sentong ya küm shia agiba sentong ka asütsü, ta pai shisem.

ANOGO ABEN TSÜNGREM DEN

Mozü shiteter tulu (T.ken 107:16-21)

Laishibaji tanela tashidak anebtsü mozü ta angazükogo. Tang mozüji shibai amshir, iba mozü amshir Tulu indangji shisadangtsü.

Yisu Khrista temenen pur temulung meyipdaktsütsü aru, aser Pai dang parnok kümzüktsü akok. Tanü alima nung tiyazü mozü shitetter lir. Parnoki kechi agütsür iba jagi tanela tebilemtsü nung meyarira. Yeremia mapang nung tiyazü ainkartemi agütsüba mozü agi teyari magütsü (Yr. 8:11,22). Doctor shibai ne tashidak tiyazü ashir iba doctor nai koda agizüktsü? Item ainkartemi Israel tanelaren jenjang tai sayu.

Doctortem magizüki aliba nüburttem lir aser nai aginüba mapang shitak nung majurutsü akok. Saka kodangsa nai jadiri Yisui arur. Pai putetba tashidakji shitak. Pai zübu ajak aser shirangba ajak anebtsütsü akok. Pai tashiyim agi Pa ne nem magitsür; Pai ne tashidak aser ne nüngdak bener arutsü ataa alir. Aser tesümangtsüji na anealuba taa ajak Pai Kalvary kangki nung agütsü.

Temenen nung sama alirtem asütsü talang (T.Mapa 2:21). Nai ne tekümtet asoshi amanga melira, tang amangang.

Mozü shitetter tului ne tanela shirangba nung mozü agütsür. Pai mamanger kümzüktsü akok, temulungjang teraksa anebtsür aser tesendaktep raksaa aliba jungtepdaktsür. Nai kechi nungsa Yisui tanebtsü agi kongshidaktsüner, Yisu dang asüngdangang.

Seoul stadium nung Billy Graham crusade bilemteta among

June 05, 2023: 1973 küm June 3 nü nüngutgu sayutsünger, Billy Graham-i South Korea yimtiba Seoul nung aliba Yoido Plaza nung sayutsüngiba sülen küm 50 ajungba anogomong nüngtem nung Honibarnü (June 3, 2023) Seoul World Cup Stadium nung sentong tuluka ka ayongzükba agiogo, aser iba sentong nungji nisung 70,000 dak tema aden.

Asür Billy Graham'er jabaso aser Billy Graham Evangelistic Association nung CEO, Franklin Graham-i iba sentong nungji sayutsüngi.

1973 küm Billy Graham crusade nungji nisung million 1.1 dak tema dena liasü aser Billy Graham indang crusade tulutibaji ibaji liasü.

1973 küm crusade nungji pastor Dr. Billy Kim-i Billy Graham-i sayutsüngibaji Korean oshi nung meyipzükja liasü. Iba crusade sülen küm 50 ajungba nüngtem nung ayongzükba sentong nung jembitsü atema Korean Arogotem aser Pastor Billy Kim-i Franklin Graham jaok.

June 3, 2023 nü agiba sentong nung jembidang Franklin Graham-i, "Tesüiba küm 50 tsüngda Korea kanga melenshiogo. Alima



Nüngtugu sayutsünger, asür Billy Graham'er jabaso, Rev. Franklin Graham aser Dr. Billy Kim (abelen) na külemi tangokba noksa nung angur. Küm 50 tejaklen Seoul nung Billy Graham crusade nung Billy Graham-i sayutsüngibaji Dr. Billy Kim-i Korea nung oshi nung meyipzükja liasü. Billy Kim ya tang Far East Broadcasting Company - Korea nung Chairman. Pa ya taoba mapang Baptist World Alliance nunga Tir inyak aser Korea nung aliba Suwon Central Baptist Church nunga pastor inyaka liasü. Longpak nung aliba noksa nung Dr. Billy Kim aser Billy Graham na külemi tangokba angur.

melenshiogo saka nenok atema Tsüngrem temeimbo memelenshi," ta ashi.

"Tsüngremi na yanglu aser Pai na meimer. Nenok temenen nungi kümzüktsü atema Pai Pa Chir Yisu Khrista alimai yok. Nai tamang agi ibaji agizüketra aser Pa dak amangra aser nenok temenen nungi pilara nü tanela kümzüktsü aser tatem maka nenok Pa tekabu nung alitsü," ta Franklin Graham-i ashi.

Iba sentong nungji nisung 70,000 dak tema aden aser nisung meyirjang aikati telemtetba agia Yisu Khrista

nem taküm bendanga agütsüogo, ta Billy Graham Evangelistic Association (BGEA)-i sangdong ka ajanga metetdaktsü.

Franklin Graham-i lokti dang, "Kübui tesüsa Dr. Billy Kim ajurudang pai pa dang, 'Asenoki Korea nung ano crusade ka ayongzükdi' ta ashi. Anungji tang iba sentong agiba ajanga kübu kanga pelaa alitsü," ta ashi.

Iba sentong jakdang osangbener den jembidang Franklin Graham-i, "Ni Korea nung meimer. Iba linük ya tashitait aser tepor tajung linük

ka lir. Nüburttem kanga tenendak aser tejungnü. Iba linük nüburttem ajurutsü ni yongyar," ta ashi.

Paisa, "Nisung aika timtemba mapang ka nung ni Seoul-i arur. Wara ajanga tayongzükba aika ajuru. Teimla lir, ta nüburttemi angatettsü nüngdak. Nisung aikati tarutsü atema shisabulur aser koleni aotsüar memetet. Ni parnok dang, Tsüngremer sentong ka lir aser asen taküm atema Tsüngrem sentong lir ta angatetdaktsüner," ta metetdakja liasü.

"Korea ama alima nung

tanga linük mali, saka sen aser technology ajanga meimchir melungjang nung tazüng mesüngtsüteter. Nisung aikati pei taküm nükjidong mangateter aser langkati mabensa ta bilema telangzüba bushir. Tsüngremi dang tazüngji süngtsütettsü. Tongmelang agi, Tsüngremi Korea nung meimba osang lemsateptsü atema ni yagi aru," ta pai metetdaktsü.

Hokolbarnü Franklin Graham'er jabaso, Will Graham-ia Seoul nung aliba SaRang Arogo nung lanurtem asentenshi sentong ka nung jembia liasü aser iba sentong nungji lanur 6,500 shi aden. Will Graham ya BGEA nung executive vice president inyaker.

Amongnüa Will Graham-i Seoul nung aliba Yoido Full Gospel Arogo nung sayutsüngia liasü.

Korea nung küm aika raraba, nüburttem sensak tia nung aliba aser Republic of Korea atema yongyaba mapang ka nung 1973 küm Billy Graham crusade ya agia liasü.

Anogo pongunü tashi Seoul nung Billy Graham crusade agiba mapang nung nisung million 3.2 dak tema dena liasü.

AO OSHI ANGAZÜKDAK:
TANÜ ANGAZÜKTSÜBA OJANG



Ranget

(v) tenük meremshii repring (stare at without blinking)

* Kübui kü dak **rangeta** repring.

Rangjang

(n) temang tema nung shi telong dena ayuba (hard lump)

* Kü tesayur ka tenütsü nung **rangjang** ka adoka liasü.

OLONG PAITEP # 6537

| | | | | | | | | | | |
|----|---|----|----|----|---|---|---|----|--|----|
| | 1 | | 2 | | | 3 | | 4 | | 5 |
| | | | | | | | | | | |
| 6 | | | | | | | | 7 | | |
| | | | | | | | | | | |
| | | | | | 8 | | 9 | | | |
| | | | 10 | | | | | | | |
| 11 | | | | | | | | | | |
| | | | | 12 | | | | | | |
| 13 | | 14 | | 15 | | | | | | 16 |
| | | | | | | | | | | |
| 17 | | | | | | | | 18 | | |

TIPILEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Repringzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioksür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümlü nungi pilar - (3)

OLONG PAITEP # 6536 TELANGZÜBA

TIPILEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioksü,
- 5. Lentli, 7. Tajangzük, 11. teronem,
- 12. Sempa, 13. Jahaz.

KHEN SHISADANGDI

POLOKBA TALI KHOTEN-KHORABA AGI KİYONGER NÜKENER

Alokba : Haeet Temba, na tali khoten-khoraba agi kiyonger kidangser junga amoa maor ama kanga jembir akoti, na komasa alirar.

Polokba : Wa yamaji na?

Alokba : Aito, na khoten-khoraba jiang maha süng rangsaba kol, ato chain saw ta ajar südito? lbaji amshia anepdang pezü paji nung saaka kiyonger ajak nukendaktsüra ta angashia ako, tera melenshiang no.

Pensioner : Tenur Alokbai ashibaji shitak ako. Tanü asüng nenok lanurtem aikati tangar atema pilema inyaksangshir, koba dang "Civic sense" ta ajar, saka karibo pi indang mepilemi pei ajung dang asaa inyakba jenti lirko, onok tantsür tamburtem ya balaka ayip majangerjito, ola ka danga angashi majung nukenerji na, pi atemaka pilemtsüla nii.

Polokba : Aeeet shitaka, tanü nungi nia melenshilaba.

- WhatsApp

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Indian Army-i Manipur nung mega medical camp ka ayonga agi



Imphal, June 5, 2023

(Agencies): Manipur nung tensa mesüngemteti alidak Indian Army-i District Administration aser Medical Authorities den yaritepa Mega Medical Camp ka ayongzüka agiogo.

June 5, 2023 nü Mega Medical Camp ayonga agi aser parnoki arrtsülen aliba yimtsüngtem aser Oksumbung o Torongloabi nung Relief Camps nung temulung agüja inyak.

Iba camp ajanga relief camps nung alirtem den

Toronglobi Awang Lekhai, Maham Leikhai, Khutekpi aser Oksongbung nung alirtem tajangzük nguogo.

Iba medical camp nung Army doctors 7, Civic doctors 5 aser Gynecology, Ophthalmology, Pediatrics, Dental Surgery & Ultrasound (USG) indang Specialist Doctors 5-i yaritepa liasü.

Mega Medical Camp ajanga medical consultations, treatments angati agütsü aser nisung 929 nem mozü angati lema agütsü.

Teyari agirtem rongnung

tetsür 450 aser tanur 235 dena liasü.

Kwakta Relief Camp nungi mepishiba ama Army medic team ka iba tesemi ao aser nisung 125 dak medical check-ups asüba den mozütem agütsü. Iba camp nung tetsür 70 aser tanur 25 dena liasü.

Mega Medical Camp ajanga meta talang pilar aliba tesemtem nung alir aser Relief Camp balala nung jenoka amonger nisung 1,054 tajangzük angu. Parnok rongnung tetsür 520 aser tanur 260 dena liasü.

Tripura sorkari nija tuition agir tesayur 28 dang asüngdangyatsü

Agartala, June 5, 2023

(Agencies): Tripura nung South District Education officer-i tesayur 28-i nija tuition agiba atema notice agütsüogo.

SDEO-i tesayurtem dang sub-division level committee tsüngdangi arutsü aser telangzüba agütsütsü tetuyuba agütsü.

Sabroom sub-division nungi tesayur 6 dang June 7 nü sub-division level committee

tsüngdangi arutsü tetuyuba agütsü. Maneni Belonia nungi tesayur 22 danga kasa sub-division level committee tsüngdangi arutsü shiogo.

High Court of Tripura-i Tripura nung sorkar school aser sorkari teyari agütsüba school tem nung nija tuition agütsü memelaba osang metetdakja lir ta district education officer-i ashi.

"Iba dak sendakba nung zünger mapa manguba

lanurtemi aiben onok dang tesayurtemi nija tuition agiba ken o benoka lir. Anungji iba atema bushisüngdang asütsü aser nija tuition aigba tesayurtem putetra ozüng tapet agi merenshitsu" ta paisa ashi.

Tesayurtem dang June 7 anepdang 10:00 ako nung Inspector of the School indang office nung sub-division level committee tsüngdangi arutsü tetuyuba agütsü.

Assam-Arunachal arrtsülen nisung ka khaset; 2 yiru



Guwahati, June 5, 2023

(Agencies): Assam kübok Dhemaji district nung Jairampur anasa nisung ka khaset aser ana yirutsü. Arunachal Pradesh nungi nisung kari injang khaloktsüdang iba lendong atalok ta osang angazüker.

Panbari nung Arunachal Pradesh aser Assam arrtsülen nungi nisung kari injang khaloktsü. Assam nungi nisung asemi süngdong atemba mapang iba lendong ya atalok.

Tasüsang ya Boga Chutia ta

jangjaogo aser pa ya Assam-Arunachal arrtsülen süngdong tema lia khaset.

Iba lendong nung Pushpa Gogoi aser Montu Gogoi na yiru aser tena mozü kidangi anir ao anepalu.

Iba tatalokba sülen nisung asem tashi mejangjaba nisungtemi pur aoba osang angazüker. Iba atema arrtsülen sepaitem mapa lemsüktsüogo aser parnoki nisung asem bushiteper.

Assam Education Minister

Ranoj Pegu-i mangyimba osang metetdaktsüogo aser ozüng alema inyakba mapa aitsü.

Asür Boga Chutia ya Borbila Chutiakari nung liasü aser iba ya Minister Ranoj Pegu'er constituency kübok lir.

Milonpur nung Monitu Gogoi, Puspa Gogoi aser Akoni Gohain nung iba lendong ung yirua lir ta Minister Pegu-isa ashi.

District administration aser Dhemaji Police ketdangsurtem tesem tonga ogo aser parnoki osangtsüsang agitepdar.

GOVERNMENT OF NAGALAND
DIRECTORATE OF INFORMATION AND PUBLIC RELATIONS
IPR CITADEL, NEW CAPITAL COMPLEX
NAGALAND: KOHIMA

No.DIPR/Post-Clr/Advt/1/2023

Dated Kohima the 5th June 2023

NOTIFICATION

With reference to the Advertisement for interview of Drivers vide No.DIPR/Post-Clr/ Advt/ 1/2023 Dated 30th May 2023 the interview date, stated for 6th June 2023 has been postponed till further notification.

The postponement is regretteregretted.

(DZÜVINUO THEÜNUO)
Director
Information & Public Relations
Nagaland : Kohima

Arütsülen Pakistan sepai aser telungpur tsüngta khatep, nisung 4 asü

Peshawar, Aami/June 05

(Agencies): Afghanistan den arütsüa aliba northwestern region nung Pakistan sepai aser telungpur tsüngta khatepdang sepai ana aser telungpur ana asü, ta army temi Hombarnü ashi.

Khyber Pakhtunkhwa province kübok North Waziristan district nung Deobar aonung khatepdak ya taoba mapang Pakistan Taliban tashi ita liasü, shirnok dang Tehreek-e-Taliban Pakistan mesüra TTP ta ajar.

Army sangdong ka ajanga ashiba agi, telungpur ana yiru aser iba tesem nung sepai temi nok-nü aika rakzük. Iba tesem nung search operation ka tenzuka lir, ta ashi.

Pakistan mitkar temi North Waziristan nung telungpur mali ta sangdongaka yangji mapang shia lendong agütsüba aser khatepba ataloker, anungji Pakistani Taliban tanaben adenshir südi ta bilemer.

TTP ya telok balaka süaka Afghan Taliban den

tesendaktep tajung lir, shirnoki Afghanistan nung US aser NATO sepaitemi küm 20 rara arur linük yutsür aoba mapang 2021 küm August ita tiyonglen Afghanistan nung yimten tashi rakzuka liasü.

Afghan Taliban temi yimten tashi rakzükba ajanga TTP tashi ulushi. Parnoki par sasa taoba küm November ita Pakistan sorkar den ceasefire agreement ka tembang aser iba sülen linük nung lendong agütsüba tali kumogo.

US-i nuclear noknü azüoktsü ayongzükba Kremlin-i agizükogo

Moscow, Aami/June 5

(Agencies): Kremlin-i Hombarnü sangdong ka ajanga ashiba agi, United States national security adviser Jake Sullivan-i bilateral arms control senaksem atema ayongzükba ya kanga tajung aser sensaksemtsü atema Russia renema lir.

Sullivan-i Hokolbarnü ashiba agi, United States-i START treaty tasenba nung latetja aliba nuclear weapons limits sülen tashi anga anidaktüsü. Iba ya linük ana tsüngda tatembangbuba nuclear arms reduction pact lir aser Russia-i mulunga agizükra iba tenangzüktepba ya 2026 küm tembangtsü.

Tir Vladimir Putin-i taküm

February ita iba tenangzüktepba nung Moscow shilem magitsü atema telemtetba agia liasü.

"Sullivan-i kanga dang tongtibang onük ka jembio. Hau onoki iba ya diplomacy ajanga jangjatsüba jenjangtem asütsü imlar aser iba sülen sensaksem atema format benoka asadangtsü," ta Kremlin otongdar Dmitry Peskov-i ashi.

Iba tenangzüktepba nung taoba US tir Barack Obama aser Russia nungi Dmitry Medvedev nati 2010 küm sign süa liasü. New START treaty ajanga strategic nuclear warheads aika United States aser Russia nati deploy masütsü atema tenokdangba

February ita iba agütsür lir.

Iba tenangzüktepba ya 2011 küm benoka inyaksangshi tenzük aser 2021 küm Joe Biden US tir akümba sülen küm pongu atema atsülangshia liasü.

Tenangzüktepba kübok Moscow aser Washington nati strategic nuclear warheads 1,550 dak tema deploy masütsü aser aser long-range missiles aser bombers 700 tashi dang deploy asütsü atema mulungteper lir.

Iba tenangzüktepba ajangasa US aser Russia naprongla nem tenangzüktepba shidak benoka inyaksangshi asür masü ibaji kati kai asadangtsü asoshi temelaba agütsür lir.

Mulungnen O



Asür Repa Ao

17th September 1968 - 30th May 2023

"Kechiyong asenok taküm lira, asenok kibuba atema taküm alir, aser asenok süra, asenok kibuba meyong". Rom 14:8

Onoki teti meima aliba kinungbo aser obala Repa Ao (Ungma) akümlü wadang tembanger iba lima toktsür aoba mapang shirnokisa pei akokba yari nübu, rongsen, shisatsü aser sarasadem agi yarigo, nenok ajak dang kangasa pelaba lemsateper. Nenok mapa tajung temeim asoshi onoki Tsüngrem tenüng asanger. Tulusang Tsüngremi nenok ajak talupusa moajangma ta ozü sarasadem.

Temeim Kinungtsü, Jabaso, Jala, Mei-mei aser Kinungertem.

Office of the Longkong Senso Mungdang

TENÜNGSANG AGÜTSÜR

Longkong Senso tajung shibai Sorkar tenzükba wadang nung bendanga agüja tenzükba ajanga temaba menden ajangzüktepetogo aser ano shibai pei sasa nendaka aser meranga inyakba nung konang tajung ajangzüktepeto asen sensosanger nem konang nüngsang bener arutsüogo, kanga dang pelaba aser tenüngsang tulu agütsür.

1. Wb. Temjensoba, promoted to Sub-Divisional Officer (Electrical)
2. Wb. T. Chubaangshi, awarded best 'Beekeeper' (Under Ministry of Agriculture & Farmers Welfare GOI, New Delhi).

Tarutsü nung ano maneni pei tenzükba wadang nung Teyanglur Tsüngremi temaleni ajungketangma ta sensosanger ajaki moaja sarasademtsür.

Sd/-
I. Imti Lkr
Tir, LSM

Sd/-
Lipokmeren Imsong
Tongti Zülur, LSM

Office of the Kangtsüng Senso Telongjem Tuli

Dist. Mokochung, Nagaland

SANGDONGER

Senso tejanga masüba nisungi, Ni Kangtsüng nunger ta lokti balala nung tenüng amshiba aruba metongshitsür.

Pai tenüng ana amshir, kaji - SUNGJEMMONGBA
Official tenüngji - Mr. AOMONGBA (NEPALI)
F/N. Chundro (Nepali)
M/N. Lt. Putunungla (Kangtsüng)
- Aitlenden Ward, Tuli.

Iba osang adokba sülen tenüng menük bener arutsüra tai tatokba malitsü ta KSTT office ajanga sangdonger.

Sd/-
TEMSUINBA
President, KSTT

Sd/-
MASAKUMZUK
Gen. Secretary, KSTT

Tiananmen Square: Hong Kong police-i activist tem apu



Hong Kong, Aami/June 5

(Agencies): Tiananmen Square massacre atalokba anogo Hong Kong nung police-i pro-democracy activist tem aika puogo.

Ketdangsurtemi 1989 küm iba tatalokba ya bilemteta yimjak nung mamungtsü atema tenokdangba agütsür lir. Iba anogo Beijing nung yimjung nung longkak aita alirtem tank amshia sepaitemi nisung aika tepseta liasü.

Ajisüaka alima ajunga nung yimti balala nung iba anogo bilemteta temo milen tsükloker munga arudar.

Police temi apurtem rongnung arishi küm 67 tain Alexandra Wong densema liasü, shiba dang "Grandma Wong" ta ajar.

Hong Kong nung tensa mesüngjemeti aliba nikongtsütsü la Victoria Park, kong küm aika asürtem bilemtetba munga arur, iba anasa naro bener oya aliba mapang apu.

Hong Kong nung opposition party tongtitem tem rongnungi lenir ka dena puogo. Pro-democracy activist tejen Chan Po Ying, shiba League of Social Democrats party tekolakba lir, pa LED candle ka aser

naro ana bener lia apu.

Taoba Hong Kong Journalists Association tekolakba Mak Yin Ting-a apu saka chiokogo. Police-i ashiba agi parnoki shinga mapu ajisüaka ken o ashishitsü atema nisung 23 anirogo.

UN High Commissioner on Human Rights, Volker Turk-i Twitter ajanga, nisung pur aoba osang angazüka pa kanga aoksaogo ta ashiba den pei temeden benshia yimjung nung adenshirtem apuba ya tangsa tang chiochtsü asoshi khanga liasü.

Beijing nung 1989 küm yimjung nung longkak aiterem tepsetba anogo ya mainland China nungbo amungtsü memelar.

Küm aika China nunger yimtitem rongnung Hong Kong nungdang iba anogo ya munga aruogo. Ajisüaka China sorkari national security law benokba sülen iba inyakyim ya ozüng alema inyakba kümtsüogo.

भारत सरकार :: वित्त मंत्रालय::राजस्व विभाग
Government of India : Ministry of Finance : Department of Revenue
प्रधान मुख्य आयकर आयुक्त, पूर्वोत्तर क्षेत्रका कार्यालय
OFFICE OF THE PRINCIPAL CHIEF COMMISSIONER OF INCOME TAX, NER
आयकर भवन, जी.एस.रोड, क्रिश्चियनबस्ती, गुवाहाटी-781005
AAYAKAR BHAWAN, CHRISTIAN BASTI, G.S. ROAD, GUWAHATI-781005
दूरभाष : 0361-2344118/2345540, फेक्स : 0361-2345118/2347512
e-mail : guwahati.ito.infra@incometax.gov.in

कोटेशन आमंत्रित करने हेतु सूचना / INVITING NOTICE QUOTATION

आयकर विभाग, कोहिमा/आइजोल के लिए कार्यालय आवास किराए पर लेने के लिए व्यक्तिगत/साझेदारी/फर्म/कंपनी/सोसाइटी आदि से मुहरबंद कोटेशन आमंत्रित किए जाते हैं। निविदा सूचनाओं का विवरण नीचे दिया गया है / Sealed Quotations are invited from Individual/Partnership Firm/Company/Society for hiring of office accommodation for Income Tax Department at Kohima/Aizawl. The details of tender notices are given below:-

1. कोहिमा के लिए निविदा सूचना संख्या 11/23-24 दिनांक 05.06.2023
Tender Notice No.11/23-24 dated 05.06.2023 for Kohima.
2. आइजोल के लिए निविदा सूचना संख्या 12/23-24 दिनांक 05.06.2023
Tender Notice No.12/23-24 dated 05.06.2023 for Aizawl.

कोटेशन, नियम और शर्तों का विवरण प्रधान मुख्य आयकर अधिकारी, पूर्वो.क्षे., गुवाहाटी की आधिकारिक वेबसाइट www.incometaxnortheast.gov.in और www.incometaxindia.gov.in से डाउनलोड किया जा सकता है। / The details of Quotation, terms & conditions may be downloaded from official website of Pr.CCIT, NER, Guwahati: www.incometaxnortheast.gov.in & www.incometaxindia.gov.in.

सभी कोटेशन दिनांक 28.06.2023 को अपराह्न 3.00 बजे तक प्राप्त किये जायेंगे तथा दिनांक 29.06.2023 को प्रातः 11 बजे खोले जायेंगे / All Quotations will be received up to 3.00 pm of 28.06.2023 and the same will be opened at 11 AM on 29.06.2023.

हस्ता/- Sd/-

[मंटू कुमार दास/ Mantu Kumar Das]

अपर आयकर आयुक्त (मुख्या.)

Addl. Commissioner of Income-tax (Hqrs.)

कार्यालय : प्रधान मुख्य आयकर आयुक्त, पूर्वो क्षेत्र
O/o the Pr. Chief Commissioner of Income-tax, NER
गुवाहाटी / Guwahati.

Nagaland Police Taekwondo team-i medal 4 angur



Medal angurtem den ABSI Seyievilie Nakhro DGP Sports Team Taekwondo Coach tangokba noksa nung angur.

Dimapur, Aami/June 5 (TYO): 2buba Open Indian International Taekwondo Championship 2023 nung Nagaland Police Taekwondo team-i medal pezü nguogo.

Iba asayamung ya Bangalore, Koramangala Indoor Stadium nung June 3 aser 4 nü asaya liasü.

Iba asayamung nung ABSI Seyievilie Nakhro DGP Sports Team Taekwondo Coach-i anir asayar pezüi shilem agia liasü.

Tebur tem asaya nung Tsutanmong-i under 63 kg nung gold medal angur aser Merichan Kikon o Mongkai

Phom nati under 54 kg aser under 74 kg category nung silver medal ngua liasü. Tetsür asaya nung Antimonyu Chang-i under 62 kg category nung gold medal ngua liasü.

Maneni Nagaland Police team nem Best Disciplined Team naroküm agüja liasü.

2buba Women's Champions Trophy tenzükogo

Dimapur, Aami/June 5 (TYO): 2buba Women's Champions Trophy tenzükoger mezüngbuba anogo Nagaland Cricket Stadium nung Japfü Dazzlers aser Saramati Warriors na asayaba Saramati Warriors-i wicket trok agi kokogo.

Toss akokba sülen Japfü Dazzlers-i mezüng bat asütsü shim aser parnok rongnungi opener Najmeen (run 22) aser Alemienla (run 48) nati kanga junga asaya tenzük. Iba sülen Bipila aser Alamlie nati run 10 aser 13 yanglua Japfü Dazzlers puri run 123 target yanglua toktsü.

Saramati Warriors atema Sariba Khan, Temjenmongla Jamir aser Mhasibeinuo Rupreo nungeri wicket kaka agi.

Run arishiba mapang Saramati Warriors nungi asayar Jyoti Thapa (run 22), Vipeni (9), Mhasibeinuo Rupreo (24), Sariba Khan (18) aser Wataro Pongen (10) nungeri kanga junga asaya over 16.5 nung run menepa wicket 6 agi asaya akok. Japfü Dazzlers atema Talirenla aser Alemienla nati wicket kaka agi.

Iba asaya atema player of the match award Saramati Warriors nungi Mhasibeinuo Rupreo nem agüja liasü.

Nagaland Cricket Stadium nung tanabuba asaya Pauna

Queens aser Tiyi Strikers na asaya aser Tiyi Strikers puri mezüng bat asütsü shim aser parnoki over 25 nung asayar 7 out ser run 133 yanglua liasü.

Parnok rongnungi Captain Sentilemla-i ball 78 nung run 88 yanglua, ajisüaka la nem teyari agütsür maliasü. Pauna Queens bowler tem rongnungi Sangtinaro-i wicket 3, Kajenkala-i wicket 2 aser Merensola o Rwisumwi nati wicket kaka agia liasü.

Asaya tanabuba shilem nung Pauna Queens atema Kajenkala (run 18) aser Rwisumwi (26) nati dang tera junga asaya aser tanungba asayartemi junga masayateti parnok over 19.1buba nung run 91 dang yanglur aliba mapang ajak out süadok.

Tiyi strikers bowler tem rongnungi Roma Subha-i wicket 4, Soyimkumla-i wicket 3 aser Tsukenshe o Sentilemla nati wicket kaka agia parnoki iba asaya run 42 agi koka liasü.

Player of the match naroküm ya Sentilemla nem agüja liasü. Lai run 88 yangluba den wicket ka agia liasü.

Kasa asayamung nung Sovima Cricket Ground nung Terogvu Titans aser Puliebadze Slingers na asaya liasü. Iba asaya ya Puliebadze-i wicket 6 agi koka liasü.

Toss koka mezüng bat asütsü shimba sülen Terogvu

Titans-i over 25 nung run 103 dang yangluteta liasü. Asaya nung Terogvu Titans captain Limatola-i run 26 yanglua, ajisüaka la nem lar teammate temi teyari junga magütsü. Parnok rongnungi Sarah aser Imsusenla nati run tekuku yanglua liasü.

Puliebadze Slingers bowler tem rongnungi Lydia T Muru aser Meriyani Kikon nati wicket anana agi aser Priyanka o Sungjemmenla nati wicket kaka agia liasü.

Asaya tanabuba shilem nung Puliebadze Slingers-i over 14.1 nung run 103 yanglua asaya akok. Parnok rongnungi Illuneule (run 23), Priyanka (16), Meriyani Kikon (15), Lydia T Muru (12) aser Mukti (run 7) nungeri junga asaya team takok dangi ani. Terogvu Titans atema Limatola, Imsusenla, Sarah aser Magdalin nungeri wicket kaka agi.

Iba asaya atema player of the match naroküm Puliebadze Slingers nungi asayar Meriyani Kikon nem agütsü.

Mongolbarnü asaya:

Nagaland Cricket Stadium 8:30 A.M: Japfü Dazzlers vs Terogvu Titans

12:30 P.M: Tiyi Strikers vs Puliebadze Slingers

Sovima Cricket Ground

12:30 P.M: Saramati Warriors vs Pauna Queens.

Sindhu aser Prannoy nati anir Singapore Open asayatsü

Aami/June 5, 2023 (Agencies): Thailand Open nung junga masayatetba sülen Singapore Open Super 750 asayamung nung defending champion PV Sindhu-i junga asayatsü imlar aser kasa mapang HS Prannoy shiba tawa kanga junga asaya arudar, tenati anir India nunger asayartem iba asayamung nung shilem agitsü. Iba asayamung ya Mongolbarnü tenzüktsü

Taoba küm August ita tetsüing yiruba sülen Sindhu-i junga masayateti arudar. Madrid Spain Masters aser Malaysia Masters nung final aser semifinal tonga asayaba sülen la tanem tanemi tajungba asaya odar.

Ajisüaka la Thailand Open nung mezüngbuba round nung Canada tsür Michell Li-i tsükdakja liasü.

Maneni Sindhu atema jenjang tamajungba kümdakja la Japan tsür world No. 1 asayar Akane Yamaguchi den asayatsü lir. India tsür la atema Yamaguchi ya opponent tesashitiba ka lir.

Tezülubana nungbo Sindhu-i la timba ben koka (14-9) lir ajisüaka tena taoba küm Thailand nung tatensa asayaba sülen aika melenshiogo aser Yamaguchi akoktsü atema Sindhu-i kanga meranga asayatsüsa akümtsü.

Kasa mapang nung Malaysia Masters nung mezüngbuba BWF title ka

abenba sülen Prannoy-bo tang kanga junga sayaba mapang ka lir.

Ajisüaka pa iba asayamung nung tejakdangi atutsü atema melarabo masütsü kechiyong pa Japan nunger third seed asayar Kodai Naraoka den mezüngbuba asayatsü lir.

Thailand Open nung semifinal tonga asayaba sülen Lakshya Sen-a iba asayamung nung mezüngbuba asaya Chinese Taipei nunger fifth seed asayar Chou Tien Chen den asayatsü.

Tebur kija asaya nungsa Kidambi Srikanth mezüngbuba round nung Thailand nunger asayar Kantaphon Wangcharoen den asayatsü aser Orleans Masters koker alisang Priyanshu Rajawat-a Japan nunger Kanta Tsuneyama den asayatsü.

Tetsür kija asaya nung Saina Nehwal mezüngbuba asaya Thailand tsür Ratchanok Intanon den asayatsü.

Tebur tarep asaya nung world number 4 Chirag Shetty aser Satwiksairaj Rankireddy na Japan nunger tarep Akira Koga aser Taichi Saito na den asayatsü aser MR Arjun o Dhruv Kapila na France nunger tarep Lucas Corvee aser Ronan Labar na den asayatsü.

Tetsür tarep asaya nung Treesa Jolly aser Gayatri Gopichand na Hong Kong tsür Yeung Nga Ting aser yeung Pui Lam na den mezüngbuba asayatsü.

AC Milan striker Zlatan Ibrahimovic asaya nungi anener

Aami/June 5, 2023 (Agencies): Sweden nunger AC Milan striker Zlatan Ibrahimovic-i ashiba agi, pai arishi küm 41buba nung football asaya nungi anentsü atema telemtetba agiogo.

Pa, Milan den tenangzüktepba yanglur aliba ya June tatemi tembangtsü aser meyanglushitsü ta shiogo. Taoba season yiruba ajanga junga masayateti arur tang asaya nungi anentsü atema telemtetba agiogo.

Sweden nunger asayar ya 2020 küm tetenzüklen Milan-i tanaben meyipa aru. Pai taoba mapang 2011 küm Milan den Seria A akok aser taoba season-a parnok rongnungi asayaba mapang league kokogo.

"Ni football dang salem ashir ashi nenok dang ashir masü," ta pai Deobarnü Mila pur Hellas Verona den tatembangbuba asaya goal 3-1 agi akokba sülen sentepa aliba lokti dang ashi.

"Ni idaki mezüngbuba aruba mapang nenoki kü nem tepela

agütsü, tanabenbo nenoki temeim agütsü. Ni ozü kibong aser kü den kanga junga sendaktepa alirtem dang parnoki aremzüka ataba atema kanga pelar," ta pai ashi.

Zlatan ya mezüng 1999 küm Malmö FF nung asaya-a pa indang career tenzük aser 2001 küm Ajax Amsterdam-i ao. Iba sülen pa Juventus, Inter Milan, Barcelona, Paris St Germain, Manchester United aser Milan nung asayaogo.

Sweden nunger asayar yagi domestic league aser cup tem aser jurila sempet mezüngdangteti agizükogo, ajisüaka pai pa indang career nung Champions League ka danga koka mali.

Ibrahimovic, shiba Sweden nunger asayartem rongnung goal timtiba (asaya 121 nung goal 62) idaktsüba asayar lir, pa 2016 küm Euro sülen national team nungi anen ajisüaka ano 2021 küm meyipa arua asaya saka World Cup qualifying campaign nung takok monguteti liasü.

BILEMDANGANG

"Nai nüdak tamang makatetra na aiben tamakok ajurutsü."